

Campaña 2021 ta birando despedida di Andin Bikker for di circulo politico di Aruba

Di su soño di ta Minister pa awor campañado pa MEP

MINISTER di Husticia demisionario Andin Bikker no a logra su obhetivo di subi lista di partido MEP, su unico opcion politico pa eleccion di 2021 y debi n'e decision di e líder di MEP, Evelyn Wever Croes di manda su Gobierno cas na luna di maart ultimo, su tempo pa tuma un decision concreto pa su futuro politico, a cay na awa.

Andin Bikker, kende tabata líder di su propio partido Democracia Real, a dicidi pa eleccion di 2017 pa uni su mes n'e partido nobo di POR di Otmar Oduber, caminda el a ocupa e di dos puesto riba e lista pa eleccion, pero cuater aña despues, POR no ta ni sombra di e partido cu a bay eleccion na 2017 y caminda a logra dos asiento.

E tempo ey despues dia hiba un lucha formal cu a termina den Corte, Bikker a hiba un lucha pa mantene su partido cu el a funda, Democracia Real pa di su maneho ora cu Alonso Tromp a trata di tuma tur cos over, pero no a logra den e intento aki.

Un sorpresa grandi Bikker a crea ora cu el a dicidi di uni su mes cu Otmar Oduber y Marisol Lopez Tromp, pa lanta partido POR, cu e ilusion cu nan lo por logra entre cuater pa cinco asiento p'asina hunga un rol grandi den gobernacion di e país.

Sinembargo POR a logra di haya un asiento y un restzettel pa un total

di dos asiento, pero Andin Bikker mes a mira su popularidad cay formalmente for di tempo cu e tabata líder di Democracia Real, caminda el a logra 1086 voto y caminda nos solamente el a cay den voto, pero e líder di POR, Otmar Oduber tambe a cay cu casi 50% den su total di votonan y mesun cos a sosode cu Marisol Lopez Tromp.

Formando parti di Gabinete Wever Croes, Bikker como miembro di POR a bin haya su mes dado momento birando líder interino di POR ora cu Otmar Oduber a dicidi di retira como Minister y como líder di e partido blau, lagando e partido den man di Bikker.

Na su turno Bikker, despues di a haya un confrontacion formal cu ex colega di POR, Marisol Lopez Tromp, tambe a dicidi di pasa liderazgo di e partido den man di Alan Howell y no a divulga su intencion riba su futuro político na tempo, pero tabatin indicacion cu e tabata den dialogo cu partido MEP.

Den seno di e partido geel tabatin resistencia pa Bikker subi lista di e partido y ora cu a bira conocí cu e lo ta den e prome diesnan, Bikker a dicidi di sinta un banda e eleccion aki, pero a anuncia su decision di campaña pa partido MEP, yudando dos candidato di e partido.

Pa hopi e desaroyo aki y e decision cu el a tuma pa no participa e bi-



aha aki den e proceso electoral, t'e final di su carrera político mirando e hecho cu p'e proximo periodo di gobernacion, e por hunga un rol solamente for di loke lo bay bira su ofishi nobo den e sector priva.

Un situacion cu poco a logra di lanta cabes bek despues di keda leu di política pa un tempo asina largo y no solamente hopi ta kere cu Bikker a perde su partido Democracia Real, pero cu el a pone su futuro politico tambe den un situacion delicado caminda practicamente lo ta difícil p'e recupera e sosten cu el a conta cune pa hopi tempo di tres eleccion electoral.

Fungiendo como Minister di Husticia, Bikker a logra su soño tan anhele cu e tabatin como político, pero na mes momento e propio soña aki y formando parti di un partido POR cu for di su salida no a musta cu e lo tin un futuro stabiel, su carrera político awor ta na un asina yama "crossroad" cu poco perspectiva pa su futuro politico.